

Polgo Korin Dabeba Si Wabo Pas Aşęani

Hasia nedebo tau sabo po

Te Korin moni hanude te Kraisgo po wali pabo we bidi hani dabe elaluali. Tama te tibo po ola mabo bidi dabe augwaligo ili po weyu tama te hani dabe bidibo tomoba pali. Te bagego augwa tibo po te Korin we bidibolo ola mobadi tama augwaligo Polde haniani dwai posobo po weyu, te aga te Godigo po sela pabo bidi mu menio wai. Tama te bidi Pol gasa digibulu bulude bidibadi agai te posobo po wabo kolesaga ebo po odolama, tama te tibo po ola mabo bagego te Korin we bidi dabego te Kraisi wali pabo kolesaga dolidali weyu, tama agai e tau sabo po aşęna tolali. Aga da te Kraisgo şę ebo bidi mu da weyu, tama agai te şę ebode te boi bidi dabego nogode sali dene dali şęęę dali te tigidali te Polgo augwaliba ola mobao. Aga te Korin buluba ma asaibao wali.

Tama te sogo te Judia tş pedaide bidibo te Godigo po wali pabo bage augwali dwagila bidibaso, tama te bidi Pol aga hani bage dali mone sisilama, te augwali magi painu yali. Tama te buku Daş 8 me 9de, te bidi Polgo te bulu Korin bidi dabe haliga hodolobo po weyu, te şęba mone maiabo po wai dao. Te te bidi Polgo silagasu aşęani pasde te e tama po wali, te tibo po sela pabo bidi aposel dabe aselama te bulu Korinde bidiyu, tama augwaligo te bidi Polgo nogi aiyaba elalubo şę eyu, tama agai te Godigo po sela pabo şę emainu te tagala palali bidi nogi aposel şę ebo nogi dolama begela tagalali. Te po wai dao.

Polgo po hanilama weyu, te Godigo tagala palali bidi aposel dabeba şę mani po wali

(Daş 1-7)

1 ¹Ena Pol dao, ena te Kraisi Jisasgo şę ebo tagala palai bidi dao. God aga homugo digi tama Godigo ena te aga şę ebo bidi muai. Ena dali, te dago ama Timoti da sigo pas te dage Godigo po odoyu te Korin moni hanude bidibo we bidi dagebolo e pas aşęna tolobao, te moni Grik tş pedai tigidali badu bidalubo te Godigo we bidi tigidalibolo eno e pas aşęna tolobao. ²Eno homugo te dago Aya God dali, te Genuai Bidi Jisas Kraisi daligo, te olo mu da tau siyu mabo wiegi yai kolesagago te dagego homu nagame ilama bidişo.

Polgo te Godigo aga tau sobaso gedu haluasa po weyu usu da wai

³Dago agabolo puba hwi po weyu, tama God nogi ugwaba sao, aga te God tama dago Genuai Bidi Jisas Kraiso Aya dao. Aga te dago Aya, tama aga te hobede eyu tau sabo page bidi dao. Aga te tigidali seęe elalubo bidigo homu nagame ilibo God dao. ⁴Te tigidali dene mabo seęe daba pedalobo agai te dago homu nagame ilibo dao. Magi basowe? Agai da homu nagame ilibo kolesagago naga dago te haniani seęe elalubo bidi dabe augwali homu nagame ilimainogo eyu, te Godigo da homu nagame bugagia ilibo dao. ⁵Magi baso meni, te Kraiso tolali genuai dene, te dago me te tiwai naga tolobao. Tama tiali goli, te sogo me te Kraiso genuai homu nagamego da paęanı dao, te nagame ilibo kolesaga te dene tiwai si pedalobo dao. ⁶Te da seęe tolobaso da, te dagego homu nagame iliyu tiaibao, tama Godigo dage ma somainogo ebao. Tama Godigo dago homu nagame ilibaso da, te dagego homu me nagame ilimainogo ebao. Te dage bomu elama dolaluyu, tama dago tolobo dene tiwai tolobaso da, teda Godigo dage homu nagame ilaibao. ⁷Tama homu si isayı, dago homugo koneani, te dage bomu elama dolalueibao. Dago koneai, dage da dali dene tolobao, tama tibaso te dage da dali te homu nagame ebo kolesaga me selama bidaibao.

⁸Ama dedeo, te dago homugo te moni tı pedai Esia tede te seęe daba pedalali te dagego koneaibao. Te genuai seęe mugo da aiyaba elaluama, tama dago bomu aiyaba mu elaluali. Tama tiyu, tama dago homugo te da isabo homu yali dao. ⁹Mu po da wali, te da homu seęe ebo te po tı ebo bidi jasgo te da isimainao po wali tiwai elama bidali. Te seęe dabe te tiwai magi baso pedalaliwe? Te dena bomogo usu yabo homu idali weyu te seęe daba pedalali. Dago te Godigo bomoba homu tialumainogo yai, te agai te isai bidi dabe augwali hodolobo bidi dao. ¹⁰Te Esia tıde dwai nai mugo da ela muainogo yali, tiali goli Godigo tede da ma dobola sai. Tama megi me te agai da ma sidu gebo dao. Tama tibaso, dago dena homu te tobage se ebo God agaba daę weyu, tama dago homu e tiwai ebo dao, sesemane sogo te dwai naigo da dolainogo ebadi, te agai da ma selama, tama da bugagia bidaibao. ¹¹Tama dagego tede Godibolo hanalu wabo po wabogo da tau sao. Tama tiyu te Godigo te we bidi hauwago aga hanalu wabo po tama odama, tama agai da tau saibao. Tama we bidi hauwago te agai da tau sali seba homu koneama, tama Godibolo usu da po agai te yali dwagi yai seđe waibao.

**Pol aga se yabo homu hasegelama, te Korin dabe
tibo po ola mayabo homu me ebo**

¹²Dago wiegi yai homu pemene ebo se e kolesaga delide ebo dao: dago homugo hanilama po pusuyu da, te magi dwai se isıbo te wiegi yai

kolesaga me tama te Godigo da mabo te meda isawai homu kolesagade bilibo po pusubao. Te e tõe bidigo koneani kolesaga te dago wali pabeo. Menio. Te Godigo olo mayu tau sabo wiegi yai kolesagago naga da tau selama, tama da te tiwai kolesagade bilibao. Tama da te kolesagade te tigidali bidi tomode bilibo dao. Tama dageba dago te kolesaga me mu ela pidu geai dao. ¹³⁻¹⁴Dago gasa po me dageba aşena tolobeo. Menio. Te po dagego nedama tama page koneabo po naga aşebao. Tama megı dagego da gisiga konesişyu, mesela naga koneai goli, dena homugo te dagego nosali da kuna koneaıbao homu yai. Tama tiyu, te Genuai Bidi ma asobo sogo te dago dagede wiegi yai homu pemene ebogia, te dagego da dali wiegi yai homu pemene yagameo, te tiwai si naga yaıbao.

¹⁵Tama dagego enade te dwagi yai abagi homu ebo kolesaga tede eno homu si isaşbaso, tama polobadu eno po weyu, te eno homugo hasia dage bidibo madibolo pelama, tama duga wiegi yai homu si sogo yagameo po wai. ¹⁶Eno homugo hasia ena dage bidibo madibolo pabo homu yali, tama eno dage tagalama, tama ena te Masedonia genuai tõe pedai teba paıbao wali, tama eno te Masedonia tõe tagalama, te ena dage bidiboba ma asaıbao wai. Tama eno homugo dagego ena te Judia tõe tagala palomainogo yai dao. ¹⁷Tiali goli, te dageba pabo tõe paliali, te ena dageba asobe. Magı basowe? Eno e tama tiabo po wai, tiali goli eno po subigila hasegelali homu elama tama eno po olo wali dawe? Ma, eno te yaıbao wali şe isaşbaso da, te eno e tõe bidigo olo po wabo tiwai elama, tama ena te homu mu isawai bidi dawe? Mu menio. ¹⁸God da, te homu mu ebo bidi dao, tama aga da dali homu keş pai bidi dao, tama agai dabolo te du walisişbo po pusubo meni. Tama tialigo da, te dago dagebolo pusali po me te page si elaluali po meni. Polobadu eno dagebolo te ena dageba asaıbao po wai. Tama homu mu naga eyu eno te po wai. Tiali goli eno gasa şe elalubaso, ena dageba ma asobo usube. ¹⁹Ena me Sailas me Timoti, dago dage tomode pusali po, te Godigo Ogwa Jisas Krais agade te po pusali. Tama Krais aga subigila hasegelebo menio, aga da te aga homu polo subigila hasegelebo bidi meni. Agai aga daş walali po togogobeo, aga yaıbao wali şe te aga mu yaıbao. ²⁰Te Godigo daş wali po hauwa elalubao, tama Kraisde naga te daş walali po tigidali mu usu nagasai dao. Tama tibaso, dago Godigo po odama, tama Kraisgo nogide naga dago te po weyu, "Awe, mu dao," te pode olama, tama dago Godigo nogı ugwaba sabo dao. ²¹Tama Godigo digı da dali dage dali bomo ilama, tama da Krais dali homugo keş pai we bidi bidıbao. Tama agai digı da diş selama tama şeba me muai dao. ²²Agai aga daş iliyu daba sa muani, tama dago homuba Tedali Mobo Bidi mawai. Godigo te da dali gasa wiegi yai şe nosali yabo homu eyu, tama te Mobo Bidi hasia dabolo mani, tama dago te koneao wai: mu tama agai te tigidali wiegi yai şe da dali mu yaıbao.

Pol te augwali bidibo madi te Korinba polo me pabeo wai

²³Te eno te polobadu aşena tolali pasgo te dageba asobode tibo po wai yaibaso da, teda Godigo eno te tibo po wali te hania haninagameo. Tiali goli, menio. Eno mu po naga obao. Te eno seęę dageba mabo te eno hagela homu yali, tama tiyu te ena dage bidibo madi polo me te Korin buluba ma asobe dao. ²⁴Te dagego Kraisde konealubo po daų olama, agaba homu tialubo te dago tonalubo tiwai me egobeo. Menio. Te agaba tialubo kolesagade dage bomu elama dolalubao. Tama dago seę dage dali eyu te dagego wiegi yai homu pemene ebo te pedalomainogo tebo dao.

2 ¹Tama tibaso, ena homugo digi eno te po wai: ‘Te eno hasia aşena tolali pas te Korin bagego selama, tama augwali homu seęę eyu bidali. Te ena augwali pageba pelama, tama augwaligo ebo kolesagade te augwaligo dwai seę yali po olama, tama augwali homu seęę ma ilibo te eno hagela ebo,’ eno dage dali te homu yai dao. ²Magi baso meni. Te eno dagebolo homu seęę mayu da, teda dego te eno homu wiegi yai pemene iligowe? Te eno dage homu seęę ilai digi da, teda ena wiegi yai homu pemene ilabo bidi menigi da. ³Dage we bidigo te wiegi yai homu pemene enabolo mabo bage dao. Tama ena dage pageba pelama, te eno homu seęę sidali weyu, te delide naga polobadu eno te pas aşena tolama tama dagego sali. Eno dage tigidalide te tiwai homugo koneai: te eno nai me delide te wiegi yai homu pemene ebaso da, teda dage tigidaligo me wiegi yai homu pemene teba ebo dao. ⁴Mu dao, polobadu eno pas dageba aşena tolali, te sogo eno homu seęę genuai badi, dene dali elalualu, tama ena gela hauwa dali weyu bidali. Eno te pas aşena tolali te eno dageba homu seęę mawainogo ebeo. Menio. Eno te pas polobadu aşani te dagego ena konemainogo yali, eno dage dali dwagi yai homu eyu godolo ebo kolesaga te genuai mu dao.

Augwaligo te dwai penani seę yali bidigo yali dwai seę sela sayao wai

⁵Te dage tomode polobadu dwai penani seę eyu homu seęę ilali bidigo, agai te homu seęę enabolo naga me mabeo. Menio. Agai te homu seęę meba te dage tigidaliba manio. Eno te po bomu elama wabo te ena hagela ebaso, tama eno te po wai, ‘Meba dao.’ ⁶Te dagego eno hasia aşena tolali pas po nedeyu, tama dagego eno po wali peyu te bidi buluba sayu yali. Tama aga dali te seę ebogo te dwai dene te dage hauwa bidigo te bidi agaba wei ponani, te tibogo aga usu ilai, te bidigo ge neyu homu begelai dao. ⁷Tama tibaso, dagego gasa kolesaga me megı iyao. Te dagego agai seęę sela şanama, tama aga homu nagame ilao. Tiyu genuai homu seęę mugo te bidi aiyaba mu elaluabuo. ⁸Tama tibaso, eno homugo dagego te duga ebo dwagi yai homu eyu godolo ebo homu te agabolo bugagia ola mao. ⁹Polobadu eno te pas aşena tolali, te dage eno usu naga sai. Eno koneainogo yali, dagego te tigidali naide eno po

wali pogowe naga suainogo yai dao. ¹⁰Tama dagego bidi me deligo seęe sela saşbaso da, teda eno me eno tagalaibao. Awe, te eno sela saşbo gasa bidigo yali se seęe elaluyu da, te eno Krai gedude te seęe sela saşbao, te dage tobade tau siyu tiaibao. ¹¹Eno te dago aga seęe sela saşbo homu yali, tiyu Satango da tibo po ola menama tama da aiyaba elaluidali weyu tiaibao. Dago agai te we bidi dolabo dwai homu kolesaga koneai dao.

**Pol aga te bidi Taitus suabo homu eyu, aga homu
seęe eyu te bulu Troasde bidali po**

¹²Polobadu gana ena pelama te Troas hanuba pedalama, te gesi wiegi yai po Krai de pusainogo yali, tama Genuai Bidigo te po pusubo tu dalalio. ¹³Tiali goli eno te moni homu tagalama, te homu nagame me elalubeo. Magi baso meni, te eno ama Taitus aga dage bidiboba pelama bidali, tiali goli aga ma asama eno aga me subeo. Tama tibaso, eno te Troas bage augwali tagalama, te Taitus gegegi peyu, tama ena asama te Masedonia moni tu pedaiba sabolai dao.

Te Godigo bomode te tagala palali bidi dabego te hwıbo bomo aiyaba elalui

¹⁴Tiali goli te Masedonia tu de eno Taitus sulama, tama agai dagede dwagi yai po olama, megi eno usu da weyu Godibolo po odu gebao. Sesemane sogo agai da tau selama, tama dago Krai go bomode te wabi hwıanı usu yai. Tama dago se ebode te Godigo po pusali, tama te bidi dabe augwaligo Krai konea sabo dao. Te koneani kolesaga te pusu ebo nai tiwai denami te tigidali habuba pabo tiwai ebo. ¹⁵Mu tama, dena digi te pusu yai denami ebo nai te Krai go selama tama Godibolo mabo tiwai dao. Te denami te Godigo augwali ma sabo tu tomode bidibo we bidi dabe augwaliba me, tama te bidi dolabo tu tomode bidibo we bidi dabe augwaliba me te denami pedalobo dao. ¹⁶Te bidi dolabo tu tomode bidibo hanigo te odobo denami te isabo denami odobo dao, tama augwali te isabo madi pedalaibao. Tama te Godigo augwali ma sabo tu tomode bidibo hanigo te odobo denami te bidibo ula sabo denami odobo dao, tama agai te bidibo ula augwaliba pedalomainogo yaibao. Te se de Godigo da tau sisayı tama dago te se ebo usu egowe? Mu menio. Tialima aga da tau mu sabo dao. ¹⁷Tiali goli, da te bidi hauwa augwali tiwai me ebo, augwali tedali tedela pelama, te Godigo pode masigi sabo bisnis se tiwai me ebo, te tiwai dago egobeo. Menio. Dago te se Godide sali, tama dago te Godigo se de tibo po subigila me wagobeo. Menio. Dago se dolasa mu tigidali ela pobao. Da te Krai dali wadolama, tama homu mu naga eyu, tama God gedude dago agai po te we bidi dabebolo pusubo dao.

Te Godigo gesi daı wali po se yabo bidi po

3 ¹Eno te da bidi sigo ebo se de te tobage po aşbaso, tama dago megi ma gagalama te dena nogi ugwaba ma sainogo ebawe?

Menio. Gasa bidi dabe, te dagebolo tibo po ola mabo bage, augwali dageba asiyu tama pas dagebolo mani. Augwali gasa bulude bidibadi, tama augwaligo te bulu page bidi dabebolo te tobage po wai, “Te Korin bagego da koneyu, da dali dwagi yai homu emainogo eyu, tama dagego augwalibolo tolabo pas aşeyu dago nogoba muao,” te po olama, tama te tobage pas dageba tolasa asai. Me ma, augwaligo dage tagaliyu gasaba pai hagede, augwaligo homugo dagego me te tobage augwali tau sabo pas aşęao wai. Te bagego te augwa nogi ugwaba sabo kolesaga ebo dao. Tiali goli ena dali Timoti da sigo te tobage tau sabo pas mao po dagebolo wabeo. Menio. ²Eno te aşena tolobo pasde po digi po dwasianu begeleyu tama obao. Te da bidi si te Godigo po pusubo şę ebo bidi mu dao po wabo pas, te pas te dage we bidi dao. Tama dage te dena homude aşęai tiwai elalubao. Te pas nedebo şę tiwai eyu tama tigidali bidi augwaligo dage suyu, tama da sigo dage dali yali şę page augwaligo haninama hania konebo dao. ³Dage haninama te dage te Kraisdı asai pas tiwai me deli bidibao. Te da sigo yali şęde Kraisdı te pas aşęai. Agai te aşębo medabugo sisi ađ selama tama me aşębeo. Menio. Agai te bidibo ula elalubo Godigo Mobo Bidigo aşęai. Agai te sawali yai masigi daide me aşębeo. Menio. Agai te we bidigo homude aşęai dao.^a

⁴Da Kraisdı wadolama tama Godiba homu tialubaso, dena homu si isayı dago dagede yali şęde te tobage po wabo dao. ⁵Mu tama, dena digi te şę ebo usu egobeo, tama tiyu dena digi dago te magi şę me deli yaibao po me wagobeo. Menio. God deligo naga te dago şę emainogo ebo usu ilibo dao. ⁶Magi baso meni, aga digi da usu ilama, tama da te agai da tau somainogo eyu gesi noma dađ wali pogo şę ebo bidi bidibao. Te gesi noma da tau somainogo eyu dađ wali po te hasia aşęani bomai po tego nai me egobeo. Menio. Te Godigo Mobo Bidigo nai dao. Magi baso meni. Te hasia aşęani bomai pogo te bidi ela mubo dao, tiali goli te Godigo Mobo Bidigo bidibo ula te bidibolo mabo dao.^b

⁷⁻⁹Te Godigo te we bidi dali polobadu yali şę dali, te agai megi ebo gesi şę dali, te şę side dago homugo kone paluyu dagalinao. Polobadu Godigo te bomu yai pogo po te sawali yai masigi daide aşęai. Tama te bomu yai pogo ebo şęgo te we bidi dabe augwali isaboba pedalaibao. Te bomu yai pogo şę te da we bidi po tı ilama, tama da şęę sai bage dao hania hanilabo şę dao. Tiali goli te şę te Godigo wiegi yai bomu yai ula dali pedalali. Tama Mosesgo gesabidi ula mu ebaso, tama Israel dabe wi eyu, augwaligo aga gesabidiba tonabo usu me ebeo. Te bomu yai pogo şę tidubadi te şę ebode te bomu yai ula elaluali. Tiali goli nosali te bomu yai ula silalio. Tama megi, megi Godigo şę ebogo te we bidi augwalibolo aga Tedali Mobo Bidi mabo dao. Megi Godigo wiegi yai gesi po pusubo şę

^a 3:3 Sai 24:12; Jer 31:33; Ese 11:19; 36:26 ^b 3:6 Jer 31:31

ebode te bidi dabe augwali doloba pai nogi nogi yaibao, te şede Godigo bomo yai ula te umabo mu elalubo dao.^c ¹⁰Tama te bomai pogo şe ebo ula polobadu sali, te tiwai ula megı meni yanio. Magı baso meni, te nosali pedalalı gasa şego aga aiyaba mu elaluama, tama genuai ula mu elalubo dao. ¹¹Magı baso meni. Te osogo elalualı şe aga te bomo yai ula elalualıgo da, teda te Godigo Mobo Bidigo te we bidıbolu maiabo gesı wıegi yai po şe, te şe sesemane sogo elalubao, te şe aga Godigo bomo yai ula umabo mu elalubo dao.

¹²Awe, te Godigo te we bidi doloba pai nogi nogi yabo po pusubo şe, te şego bomo yai ulago te Mosesgo manı bomo yai pogo ula aiyaba mu elalubo dao. Dago te şede te homu eyu tama dwagi yai homu ebaso, da wı me egobeo. Menio. Bomo eyu dago po hanılama pusudubao. ¹³Dago te Mosesgo yalı kolesaga tiwai me ebo meni. Agai aga gesabıdı te ugwa namıgo mesegeleyu palıa sıdu geai, tama te İsrail dabe augwalıgo te aga gesabıde elalubo ula sula painogo ebo munu me sıdalı weyu idu geai.^d ¹⁴Tıalı gılı te İsrail dabe augwalıgo homu mu puna peyu, kone tuş palı. Tama tıgıdalı sogo augwalıgo te Godigo te we bidi tau sabo poloba daş walı po naga te bukude nedeyu iduai, te ugwa namı tiwai me augwa homude elalubadı, te megı e sogoba usu nagasoba. Menio. Te Kraıs delıde naga Godigo te homu mesegalualı ugwa namı dagala şabo dao. ¹⁵Awe, tıgıdalı sogo te İsrail dabe augwalıgo te Mosesgo aşanı po nedeyu ebo, te ugwa namıgo augwalıgo homu mesegalualı tiwai elalubao, te megı e sogoba usu nagasobao. Tama te nedebo po page augwalıgo kuna konebo menio. ¹⁶Tıalı gılı, bıdıgo homu Genuai Bıdıba ma begelegı pobaso da, teda agai te bıdı aga homu mesegalualı ugwa namı dagala şabo dao. ¹⁷Te pode, te Genuai Bıdı walı, te da aga te Godigo Tedalı Mobo Bıdı dao. Tama Genuai Bıdıgo Mobo te bıdı me delı dalı bıdıyu da, teda te nai me delıgo te bıdı me keşlugobeo. Menio. Aga olo mu bıdıbo dao. ¹⁸Tama da tıgıdalı, da te nai me delıgo da gesabıdı me au palıalubeo. Tama Genuai Bıdıgo wıegi yai bomo yai ula daba asıyu, tama da te gesabıdı subo aş dula tiwai pedalama te ula te bıdı dabe augwalıba pobao, tama augwalıgo subo dao. Sesemane sogo dago ula umabo mu sabo, tama da hasegeleyu tama Genuai Bıdı aga noma tiwai pedalobo dao. Genuai Bıdı aga te Mobo, tama agai te tiwai kolesaga da dalı ebo dao, tama te bomo yai ula te genılama mu ela pabo dao.

Godigo po sela pabo bıdı augwalı te toşo nıgai sene tiwai

4 ¹Godigo da homu dene eyu tau selama, tama te agai gesı daş walı po pusubo şe dabolu mawai. Tama tıalıgo da, teda te şede da bomu kımı isayı me egobeo, te şe tagalabo homu me egobeo. ²Menio. Dago

te geme dualama hale ebo kolesaga te tudiba muanio. Te tibo po wabo kolesagade da me bilibeo. Tama dago Godigo po me hasegelegobeo. Menio. Dago mu po hanilama mu pusubo da, tama tigidali bidi deli deli augwa homugo dago pusubo po mu po dao konemainogo ebo dao, tama augwa dago ebo şe God gedude konemainogo ebo dao. ³Tiali goli te dago pusubo gesi wiegi yai po, te po te geme duala sobaso da, teda te hagayabo we bidi dabe augwaligo gedude naga te po te geme dualubao. ⁴Magi baso meni. Te e tşde tibo god Satan agai te Kraisgo poba augwa homu begi pişabo bidi dabe augwaligo homu kone tuş palali. Magi baso meni, Kraisi aga da te God tiwai mu dao, tama agai dabolo Godigo noma mu hanilibo dao. Tama te Kraisgo genuai bomo yai ula waselabo wiegi yai gesi po, te po te giliga nanobo tiwai dao. Tiali goli te hagayabo we bidi augwaligo te pogo nanobo ula suidali weyu, Satan agai augwaligo homu kone puna palama tuş palali. ⁵Dago denade po te we bidibolo me pusugobeo. Mu menio. Dago e tiwai po pusubo dao: “Te Kraisi Jisas aga dago Genuai Bidi dao, tama Jisas tobade da te dagego şe ebo bidi bidibao,” te tiwai po pusubo dao. ⁶Magi baso meni, e tiwai dao. Polobadu mu Godigo te po wai, “Te be hulua sai madi ula pedalomainao,” wai. Tama te po wali God aga ula digi da dali bidibao, tama da homu ula mu ilibo. Te ula e dao: dago te Godigo bomo yai ula te Kraisi gesabidide elalubo koneai dao.^e

⁷Tiali goli ena dali, te ena dali deli şe ebo bidi dabe dali, dena te bomo yai ulade po pusubo wiegi yai şe elalubo, te tşgo nigai olo sene tomode elalubo tiwai eba, te dena isibo tigde naga elalubo dao. Te tigidali bidigo konemainogo eba, te Kraisi wiegi yai gesi po pusubo şe ebo wiegi yai genuai bomo mu, te Godigo bomo naga dao. Te dago menio. ⁸Edao. E tiwai dao, te tigidali badu te bidi dabego dabolo te seşe madu gebo dao, tiali goli tego da mu dolobeo. Te hauwa sogo dago dena pabo tuş hania konebo menio, tiali goli tigidali sogo dena tuş me elalubo dao, te mu daş wabeo. Tama tibaso da Godigo şede bomo kimi munu me isibo menio. ⁹Te boi bidi dabe augwaligo dwai şe da dali yainogo da pobesa bilidu gebo dao, tiali goli Godigo da me tagalobeo. Augwaligo da elama tulaluidu gebo dao, tiali goli da mu me dolobeo. ¹⁰⁻¹¹Polobadu te gasa bidi dabe augwaligo Jisas aiyaba elalubo homu eyu, tama agabolo dene menama tama aga isali. Tama te tiwai me te boi bidi dabe augwaligo dabolo seşe megi mayu, tama dene me mayu, tama da hauwa sogo paşe isali, te Jisas tobade. Tialima dago Jisasgo bomu selama tama aga şe eyu, te gasa bage augwaligo te suyu konebo dao, te guş pagede ma hodolali bidi Jisasgo da isabo tigde bidibo bage tau siyu, tama dago agai şe tama ebo dao. Augwaligo da dali tama homu ebo dao. ¹²Tama tibaso, te e tiwai

^e 4:6 Gag 1:3

dao: te isabo şe te dade hauwa sogo idubao. Tiali goli dago Kraisgo bomo elaluyu, tama agai gesi wiegi yai po pusubo şe ebaso, tama dagego te bidabo ula bugagia siyu tama bidada peyu, bidada paibao.

¹³Awe, te isabo şe enade hauwa sogo idubao. Tiali goli dago Godigo po pusubo şe tagalobeo. Magi baso meni. Polobadu te Godigo po bukude bidi me deligo te po wai, “Eno Godiba homu elalubaso, eno po hanilama pusai,” te po aşani. Tama dago me te tobage homu eyu, dago Kraisba homu elalubaso, tama dago te Godigo gesi wiegi yai po te we bidibolo me hanilama pusubo dao.^f ¹⁴Dago homu si isayü tama mu koneanio, Godigo dago Genuai Bidi Jisas hodolali, tama agai da me Jisas dali hodolama, tama da dali dage dali aga paba odasa paibao, te da tigidali aga gesabidiba pedalaibao. ¹⁵Magi baso meni. Te tigidali şeşe te da Godigo po pusubo bidi dabebe pedalali, te dage tau somainogo tama yai. Nosali Godigo olo mu tau mani wiegi yai kolesaga te we bidi umaboba ela pelama, tama genilama augwaligo usu da po umabo mu Godibolo waibao, tama aga nogi ugwaba mu saibao.

¹⁶Dago te homugo konebaso, tama da Godigo şeşe bomu kimi munu me isibo menio. Te mu tama, dago tigi dolainogo ebo dao. Tiali goli magigo meni, dago homu dali noma dali si te tigidali deli deli sogo gesi ma pedaliyu ebo dao. ¹⁷Te e tiwai: te da Godigo po pusubo bidi dabe, te dabolo pedalubo şeşe te dwasianu dao, tama te pewardage sogo naga osogo elaluaibao. Tama da e tşde bidibadi te şeşe tolobaso, nosali dagalude dago te sesemane sogo bugagia bidada peyu, bidada pabo wiegi yai nai mu saibao. Tama te dagalude bugagia bidabo te wiegi yai şeşe te dago megi elalubo dwasianu şeşe aiyaba mu elaluaibao, te wiegi yai mu naga yaibao. ¹⁸Magi baso meni. Dago te gedugo e tşde subo nai dabebe dago tonşlş me ebo meni. Te menio. Dago koneanio, dago gedugo subo nai, te pewardage sogo naga elaluaibao. Tama dago gedugo te susiabo nai, te sesemane sogo bidada peyu, bidada paibao. Tama tibaso, te tobage naiba naga dago dena gedugo tonşlş ebo dao.

Dago gedugo susiabo nai tonalubadi bilibo dao

5 ¹Dago te daba pedalobo haniani şeşe tede moni homu me ebo menio. Magi baso meni. Dago te tiwai koneanio: te da e tşde megi elalubo tigi da, te dena osogo bidabo be tiwai dao, te nami ugwa be tiwai dao. Tama te osogo bidabo be hugibaso da, teda Godigo da maiabo be me deli elalubao. Te be bidigo nogogo me şeş ebeo. Te dagalude elalubo, tama te be sesemane sogo elalua peyu, elalua paibao, te be gamonaibao. ²Megi da e tşde tigi elalubadi, te haniani şeşe toloyu, tama dago te hagela homu eyu me sogo gela weyu bidibao. Magi baso meni. Dago dena

^f 4:13 Tib 116:10

te dagalude elalubo be, te dago gesi tigi, tego te da tigi te gudubo ugwago mesega sabo tiwai emainu godolo ebo dao. ³Dago tigde te gudali da, teda da tigi bolu olo tiwai me bidibo augwaligo sugobeo. ⁴Awe, da e osogo bidabo ugwa bede me bidaludu, tama da seşe siyu gela weyu bidibao. Te dago poloba tigi tagalainogo homu eyu me wabeo. Menio. Dago homugo dago gesi tigi mubode, te gesi ugwa tiwai elama, teda te isibo tigi te aga bidibo ula somainogo ebo dao. ⁵Godigo digi dago te gamonabo tigi somainogo dabolo sisi ilai dao. Tama agai Tedali Mobo Bidi dabolo mani. Te Godigo me badu nai dabolo nosali mawainogo te agai hasia podolali nai te Tedali Mobo Bidi dabolo mani, tama dago e tama koneai: mu tama te agai tigidali nai dabolo maiabo homu yai, tama mu mawaibao.

⁶Tama tego dago homu sesemane sogo daş waliyu ebao. Dago tede bomo elalubao. Dago koneani, megi te dago tigi te dena bidibo be tiwai elalubao. Tama megi e sogo da ede me bididubadi, da Genuai Bidigo bulude aga dali me bidibeo. ⁷Menio. Tama megi da e tşde bididubadi, dago dena homu tigidali agaba muyu tama aga dali bilibo dao. Dago gedugo aga susişbadi tama tibo dao. ⁸Tiali digi, dago homu sesemane sogo daş waliyu elama dago bomo elalubao. Dago homugo e elalubo tigi tagalama tama Genuai Bidi dali hodobo bugagia mu bidigi pabo homu godolo ebo dao. ⁹Tama da dena tigde me bididubadi, ma tigi tagalama gasaba bidigi pai, te magigo menio. Sesemane sogo dago homu bomo elama, te Genuai Bidigo godolo yabo kolesaga tigidali naga inao homu ebo dao. ¹⁰Magi baso meni. Dago koneani, da tigidali te Kraisgo po tşde hania hanilama pedalaibao. Tama da megi e bidibo tigi dali bidiyu tama wiegi yai kolesaga ebaso, ma dago dwai kolesaga eyu me yali da, teda da tigidali deli deli te dena yali kolesagade usu nama tama dago te tiwai saibao.^ş

Dago te we bidi dabego God dali deli homu ilibo seş yabo po elalubao po wali

¹¹Te da tigidali te moni po tşde pedalaibao homu ebaso, da Genuai Bidide wi eyu, tama te bidi dabe augwaligo te da Godigo po sela pabo bidi dabe mu dao te hania konemainogo eyu, dago augwalibolo homu bega sabo po weyu bidibao. Godigo da gisiga koneani. Tama eno homu te dage me, dage deli deli duga te dwai seş dali dwagi yai seş dali dagalabo homugo ena hania koneai, te ena homu mu eyu te Godigo seş ebo bidi bidibao. ¹²Te dagego homugo da wiegi yai bidi da homu emainogo, dena digi dena nogi ugwaba siyu te po me wabeo. Menio. Dage tomode bidi meba hagoma homu eyu, augwa nogide naga olo wiegi yai homu pemene

ebo bidi dabe bidibao, augwa ebo kolesagade wiegi yai homu pemene me isabo bage dao. Tama bidiyu, augwaligo da Godigo po sela pabo bagede nogi posobo po wabo dao. Tama te ena te homu mu eyu Godigo se ebo bidi bidibao po, dago te po asena tolali, te u tobage bidigo gedude dagego da dali wiegi yai homu pemene emainogo ebao. Dago homugo dagego te bidi dabego wabo ena nogi posobo po te po wei ponabo usu yaibao homu yali. ¹³Eno te Godigo se bombo ebadi, tama gasa bidi dabe augwaligo ena dene mabo dao. Tama ena dali boi bidi homu ebo bage augwaligo te se sulama tama “Te bidi Pol aga polobo bidi mu dao,” augwaligo enade te po obao. Te usu dao, eno Godigo se me yaibao. Me ma, da Godigo se ebo bage, da homu dolo elaluyu bidibaso, teda tama bidiyu, dena se eyu, tama tebogo dage tau sabo da, te dage tobade te se ebo dao. ¹⁴Magi baso meni. Te Kraisgo da dali dwagi yai homu eyu godolo ebogo, tebogo naga da homu hodolama tama dago Godigo se ebo dao. Magi baso meni, dago homugo bugagia kone palama, tama te tiwai homu koneanio: bidi deligo da tigidali hasegelama tama da tobade aga isalio, tama tede da tigidali isai tiwai yai dao. ¹⁵Tama agai da tigidali hasegelama isalio, te agai tama tibaso, da bidibo ula dali bidibo we bidi dago dena digi homu koneama munu me biligobeo. Menio. Te da tobade hasegeleyu isama tama ma hodaluuli bidi, te dago aga homu naga wali peyu tama aga se eyu bilao.

¹⁶Tama tibaso, megi dena digi te poloba te tode bidi dabego ebo homu kolesaga wali me pisama tama bidi me deligo kolesaga me dagalogobeo. Mu tama, polobadu dago te tode poloba homu kolesaga wali peyu tama Krai dagaloyu tiwai. Tiali goli megi dago aga te dagalabo kolesagade me dagalobeo. ¹⁷Tama tibaso niwai bidi Kraisba wadolobo si da, teda Godigo aga gesi noma bidi mu ilama pedalaibao. Bugagia odao. Megi te bidigo ebo poloba kolesaga tigidali silalio, tama gesi kolesaga pedalai dao.

¹⁸God aga digi te tigidali hasegelebo se page bidi dao. Polobadu da agade boi bidi bidali, tiali goli Kraisgo yali se de Godigo da aga dali deli homu ilama, tama da aga abagi hani pedalai. Tama agai te se dabolo mani, te aga tau selama te aga dali boi bidi homu ebo bidi dabe augwaligo aga dali abagi homu pedalomainogo ilibo se dabolo mani. ¹⁹Dago pusubo po e tama tiwai: God agai te Kraisgo yali se go te tigidali we bidigo te boi bidi se ebo kolesaga tagalama, tama aga dali abagi homu pedalomainogo yai. Agai te augwaligo yali dwai se de homu kone ma ebeo. Tama agai dabolo te boi bidi dabe aga dali abagi homu ilabo po pusubo se dabolo mawai dao. ²⁰Tama tibaso, dago te Kraisgo pedauwalide po selama tama agai po pusubao. Te tiwai God aga digi te tigidali bidi dago pedauwaligo i obao. Dago Kraisde digi te po tigidali we bidibolo pusubao, tama dago te tiwai po augwalibolo obao, “Te dagego boi bidi homu ebo kolesaga tagalama, God dali abagi homu ebo kolesaga mu yao,” dago te po pusubo dao. ²¹Te bidi Krai agai dwai se me isawai, tiali goli da tobade Godigo

dago dwai se yali sege tigidali agaba sisinama, tama aga te dwai sege sai bidi tiwai mu pedalai. Agai tama tiali te da Kraisd wadolomainogo yali, tama agai bomogo da te Godigo gedude doloba pai we bidi pedalomainogo yai dao.

Godigo po sela pabo bidi dabe augwali te seđe sege hauwa tolali po

6 ¹Dago se God dali eyu tama dago te tiwai po bomu elama dagebolo obao: dagego te Godigo olo mani wiegi yai tau sabo kolesaga salio, tiyu dagego agai te olo mu mani wiegi yai tau sabo kolesaga tagalabuo, te kolesagago agai se dage tomode bugagia emainao. ²Magi baso meni. Polobadu Godigo aga we bidi hanibolo te po wai dao, “Te eno bodolu mani wiegi yai sogo, eno nago po odai dao. Tama te bidi dabe augwali ma dobola sabo sogode, eno nage tau sali.”^h

Odao! Megi naga te bodolu mani wiegi yai sogo. Megi e sogo naga te Godigo da ma dobola sabo sogo dao. Tama tibaso, dagego agai olo mabo wiegi yai tau sabo kolesaga sula tagaligimio.

³Dago homugo te bidi dabe augwaligo dwai po te dago ebo seba me badi te tama po waidali homu elama, tama augwaligo Godigo po tudiba muidali weyu, dago te bidi dabe augwali sağade magi nai me deligo enama tulaluabo se me egobeo. ⁴Menio. Da Godigo se ebo bidi bidiyu, tama tede sesemane sogo dago wiegi yai kolesaga ebogo tigidali bidibolo dago ola mayu, te tiwai ebao: te haniani sege daba pedalubaso, tama dwai naigo da dolobadi me, tama te dabolo pedalobo dwai sogo tego da dağ obadi, te da bomu elama mu dolalubo dao. Tama tibaso, tigidali bidigo konebo dao, te da Godigo se ebo bidi dabe mu dao. ⁵Bidi dabe augwaligo da elama tama da kalabus iliyu yai. Te boi bidi dabe augwaligo da pobesa bilama tama moni po dağ weyu, po dwai i olama dabolo wai. Da moni se dene mu yali. Da hauwa sogo bugagia godege me pişawai. Tama da nai sili bidiyu yai dao. ⁶Dago meda işawai wiegi yai kolesaga eyu, tama Godigo pode dago wiegi yai homu kolesaga elaluyu kuna koneai dao. Bidi dabego dabolo dene mani goli, dago wado po polo me wasiabo. Dago te bidi tau siyu, augwalibolo wiegi yai kolesaga ilibo dao. Dago te Tedali Mobo Bidigo bomu elalubao. Dago dena homu mu eyu, te dwagi yai homu eyu godolo ebo kolesaga te bidi dabe augwalibolo ebo, te pedauwalide naga te kolesaga ebode me wabo meni. Tama dago te tobage kolesaga ebadi, gasa bidi dabe augwaligo koneagameo, da te Godigo se ebo bage mu dao. ⁷Dago mu po pusubo dao. Dago dena se Godigo bomode ebo dao. Dago doloba pai kolesaga ebo dao, tama tebogo te wabi hwiibo nai te dolo nogode me, pobase nogo me elalubo

^h 6:2 Ais 49:8 ⁱ 6:5 Tpi 16:23

tiwai elama, tama tede dago wabi hwibo dao. ⁸Tama bidi mebago dago nogi ugwaba sabo dao, tama bidi mebago da nogi aiyaba elaluyu ebo dao. Mebago posobo po dwai dabolo wabo, tama mebago gasa bidi dabe augwalibolo te dago wiegi yai kolesaga ebo po pusubo dao. Boi bidi dabe augwaligo da tibo po weyu, te we bidi dwai se tomoba kegebo bidi da homu ebo dao, tiali goli menio, dago mu po naga wabo dao. ⁹Te we bidi mebago gedude te da nogi meni yai bage da, da koneabo bidi meni ebo tiwai ebo dao, tiali goli bidi hauwago da koneani. Da te isainogo ebo bidi tiwai ebo dao, tiali goli meni, da bidibo ula dali me bididubo dao. Te Godigo da dodoloyu te keloago elebo tiwai ebo, tiali goli agai da me ela mubeo. ¹⁰Da Godigo se ebo bidi dabe, da te homu sege mu hauwa sogo ebo dao, tiali goli te magigo meni, sesemane sogo dago homu pemene wiegi yai ebo dao. Da te magi nai meni yai bidi tiwai bidibo dao, tiali goli tagala, dago te mu wiegi yai nai hauwa we bidi hauwabolo mabo dao. Da te bidigo gedude te magi nai deli me meni yai tiwai ebo dao, tiali goli te meni, dago tigidali nai mu elalubo dao. Tama tebogo te tigidali we bidibolo hania ola mabo dao, da te Godigo se ebo bidi dabe mu dao.

¹¹Dage Korin bulu we bidi dabe, dagebolo dago dena homu hania hanilama dagebolo megii tama wai dao. Dago dage dali dwagi yai homu eyu godolo mu ebo kolesaga te genuai mu dao. ¹²Dago dena homu dagede me palia sabeo. Menio. Dago dage godolo mu ebao. Tiali goli duga digi duga homu da dali palia selama, tama da deli homude me bidibeo. ¹³Megi eno dagebolo wabo po te ayago aga waibolo po mobo mayu wabo po tiwai obao: dabolo te kolesaga wei ponoyu, dagego me da dali dwagi yai homu eyu, da godolo mu genuai yao.

**Da te Godigo be tiwai elalubao, tiyu Godigo po
wali pisabo bage dali kisasa biligio wali po**

¹⁴Te Godigo po wali pisawai bage augwali te tedali gasagi yai, tama dage augwali dali kisasa bilama tama augwaligo ebo kolesaga tau me selamuo. Menio. Magi ilama tama te doloba pai kolesaga dali, te bomai po sela sabo kolesaga dali, te si dali abagi omainu yaibawe? Menio. Mena tama te ula te be hulua sai dali deliba sisinimainogo yaibawe? Te usu egobeo. ¹⁵Ma, te Krai te Satan dali deli homu elama bidibo da, agawe? Te Krai se konealubo po daw wali bidi dali, te konealubo po daw wasiqwani bidi dali, te augwali sigo deli homu tolaluaibawe? Mu menio. ¹⁶Mena tama dago te Godigo wiegi yai be dali, te bulu haubo bidigo dali si te deli madi sisinaibawe? Te tiwai me egobeo. Dagego koneani, da digi, da te bidibo ula elalubo Godigo bidabo be tiwai dao, te polobadu Godigo te tiwai po wai,

“Te ena augwali dali bidiyu, tama augwali tomode bilaibao. Tama ena augwaligo God bidiyu, tama

augwali eno we bidi bidaibao.”^j

¹⁷Tama Genuai Bidigo te aga we bidigo te dwai şe ebo bage tagalamainogo eyu po ma wai,

“Tama tibaso, dagego augwali tagalama, tama gasa madi bidigi pao, tedali mu bidao. Tama dagego te augwaligo dwai şe yabo meda yai nai munu me tolamuo. Tama ena digi eno dage saibao.”^k ¹⁸Tama ena dagego Aya bidiyu, tama

dage eno wai ogwa me wegi me bidaibao, Genuai Bidi tigidali bomo page bidi, agai te po wai dao.”^l

7 ¹Eno ama dede muo, dago te Godigo te da dali daş wali po dabe tama salio. Tama tibaso, dago dena tigde me homu elalubo meda tigidali sela şanama tama wiegi yai tedali bidinao. Tama dago Godide wi elama, tama wiegi yai doloba pai kolesaga mu naga sesemane sogo wali pinao.

Polgo te Korin bulu bidi dabe dali wiegi yai homu pemene mu yali po

²Dagego da dali dwagi yai homu eyu da godolo mu genuai yao. Magi baso meni. Dago bidi me delibolo dwai şe me ilibeo. Dage deli me dolosişwai. Te dago bidi me deli tibo po ola menama, agai nai anoma elama me sisşwai. ³Eno dagebolo te tiwai po kisiliyu me wabeo. Magi baso meni. Eno tama tiwai po polobadu walio: dago dage dali dwagi yai homu eyu godolo mu ebao, tama dage isibo si da, teda da me dage dali isabo homu yaibao. Tama dage bidibo ula elaluyu bidibaso da, teda da te bidibo ulade dage dali bidabo homu yaibao. ⁴Eno dagede homu si ebo meni. Eno homu pemene wiegi yai dagebolo ebao. Te tigidali dabolo pedalobo şeşede, te eno homugo dage koneama, tama tede ena homu dua nagame mu ilama bidibo, tama eno homu wiegi yai pemene mu elalubo dao.

⁵Magi baso meni. Polobadu da aselama te Masedonia tşba sabolali, tama tede me da tigi dwasianu toma me nabeo. Menio. Te haniani şeşe daba pedalai. Dago po konila te Godigo po odisşbo bidi dabe dali wali, tama da homude wi yali. ⁶Tiali goli God da, te şeşe elalubo bidigo homu dua nagame ilibo bidi dao. Agai te Taitus da bidibo madi asobogo agai da wiegi yai homu nagame ilai dao. ⁷Taitus te da bidibo digi sabalobode, tede naga te Godigo da wiegi yai homu nagame me ilibeo. Menio. Dagego Taitusgo homu nagame ilibaso, tama agai te po sela asali, tama tede me Godigo dago homu nagame ilama bomu mani. Taitusgo te dagego da suabo homu godolo mu eyu, tama dagego enade homu dene eyu gela wabo po dabolo pusali, tama dagego ena dali deli homu elama bidabo

^j 6:16 1 Ko 3:16; 6:19 ^k 6:17 Ais 52:11 ^l 6:18 2 Sml 7:14; 1 Sto 17:13; Ais 43:6; Jer 31:9

homu ebo po me wali. Tama eno homu pemene wiegi yai hauwa mu eyu bidibao.

⁸Eno koneani, eno aşana tolali pasgo dagebolo dene mani, tiali goli tede eno ge nabo meni. Mu tama, polobadu hasia bolo eno tede ge nani, tiali goli megi da menio. Eno koneani, te pasgo dagebolo homu seęę mani, tiali goli te pewadage sogo naga yalio. ⁹Taitusgo po dabolo pusubaso, megi eno homu pemene wiegi yai ebao. Eno dage homu seęę yalide wiegi yai homu pemene me ebeo. Menio. Eno te homu seęęęo dage homu begelali, tede eno wiegi yai homu pemene ebao. Eno koneani, dagego duga homu begelemainogo eyu, Godigo digi te homu seęę dageba pedalomainogo ilali. Tama tibaso, dago pogo dage dwasianu me dolobeo, te eno aşani pogo dage te tiwai tau sai dao. ¹⁰Homu seęę ilibo te Godigo nigilibo, tebogo da bidi dabe dago dwai se yalide ge neyu tama homu begelemainogo ebo dao, tama te kolesagade Godigo da ma saibao. Tama dago te homu begelebo kolesagade te ge negobeo, te dwagi yai naga dao. Tiali goli te tede bidi dabe augwaligo homu seęę ebo kolesagago, tede te isibo se pedalobo dao. ¹¹Dagego bugagia homu koneao. Te homu seęę Godigo dagebolo mani, tego agai te haniani wiegi yai kolesaga dagebolo pedalomainogo yali. Agai dage asesela selama, tama dage hogodolama duga po dodolomainogo yali. Agai dage hodolama te dwai penani se yali bidi wado ilama, tama dage Godide wi yaibao. Dagego homugo da suabo homu elama tama gela weyu, tama dagego te dwai penani se yali bidi dodolobo se bomo elama yabo homu yai. Te dage tomode te bidi me deligo dwai penani se yali, tede te tigidali badude dagego ebo kolesaga te po dodoloyu yali. Dagego kolesaga tama tiwai hania hanilama pedalai dao. Tama tiyu, te dagego te bidigo yali dwai seęę megi seęę me elalubo menio.

¹²Te mu tama, polobadu eno te pas dagebolo aşana tolali. Tiali goli eno te bidi me deligo dwai se yali te homu elama te po me aşębeo. Tama eno gasa bidi homu me ebe, te agabolo dwai se yali bidi me homugo konebeo. Eno homugo augwali siba naga homu elama te po polobadu aşana me tolobeo. Menio. Eno te dagego kolesaga hanilama pedalomainogo yali, tama God gedude duga bugagia konemainogo yai: dagego da godolo mu yalio. Tede me tama eno te polobadu pas dagebolo aşana tolali. ¹³Dagego te kolesagago da homu nagame ilama dua bidai.

Tama dago homu nagame naga me ebeo. Menio. Dago homu wiegi yai pemene yai. Magi baso meni. Dage tigidaligo te Taitusgo homu noma toma nabo nigilali, tama aga wiegi yai homu pemene yalio. Dago te sulama, tama da wiegi yai homu pemene mu idubadi bidali. ¹⁴Polobadu eno dage nogi te Taitus gesabidide ugwaba sali, tama megi eno te pode ena hale me sabeo. Menio. Tigidali po dago dagede wabo po, te mu po naga wai dao. Tama tiwai naga eyu, dago dage nogi te Taitus gesabidide

ugwaba sali, tama te eno dagede agabolo pusali po me hanilama pedalali, te mu po naga dao. ¹⁵Taitus aga dage bidibo madi pedalobaso, tama dage wi elama didibili eyu, tama dagego aga siyu geseali, tama dage tigidaligo agai po wali pai. Agai megı te homu me konedu tama agai dage dali dwagi yai homu eyu godolo mu ebo homu genuai pedalobo dao. ¹⁶Megi eno homugo mu konebo, eno dage dali homu si ebo meni, te dagego tigidali kolesaga dolo mu ebaso, eno homu dageba tia pabo te usu dao.

Te Korin dabe augwaligo te mone me doado bage sisi elama, te Godigo po odobo we bidi te Judia tde bidigo bage tau sinao po wali

(Daı 8-9)

Te Godigo po odobo we bidi augwaligo ama dede tau sao po

8 ¹Ama dedeo, te Godigo po odobo we bidi hani dabe te Masedonia moni ttomode te haniani bulude elalubao. Tama dago homugo dagego koneao, te Godigo olo tau sabo wiegi yai kolesagago augwali tomode yali se, te dagego koneao. E tiwai dao. ²Genuai seęe augwaliba pedalama, tama tego augwali homu usu sabo se mu yali. Tama te sogo augwali magi nai meni yai mu bidali. Tiali goli magigo meni homu elama, augwaligo wiegi yai homu pemene genuai mu dali elaluali. Tama tiyu, augwaligo te gasa Godigo po odobo we bidi tau sabo homu mu genuai elama, tama augwaligo masigi hauwa sisinai dao. ³Eno koneama tama eno po hanilama obao: augwaligo augwa digi homu kolesaga wali pelama tama te masigi muani. Augwaligo maiabo nai usu selama, tama te tiwai augwaligo mawai. Awe, augwaligo te maiabo masigi aiyaba elaluama tama umabo mu madu geai. ⁴Augwaligo te dago usu da po omainogo bomo mu elama augwaligo me te Godigo po odobo gasa we bidi dabe dali hodobo augwaligo augwa masigigo te Godigo Juda we bidi olo tau sabo se yaio po bomonama wali.^m ⁵Polobadu dago augwalide tama tiwai homu yali, 'Te augwaligo mone meba mawaibao,' wai. Tiali goli augwaligo te tiwai naga me ebeo. Menio. Hasia bolo augwa bolo augwa digi te dago Genuai Bidibolo menama, tama augwaligo te Godigo homu wali pelama, tama augwa digi dabolo me mawai dao. Tama elama tama augwaligo augwa tau sabo masigi me mawai dao. ⁶Polobadu Taitusgo te Juda bage olo tau sabo wiegi yai kolesaga ebo se dage tomode hodolali. Tama te Masedonia we bidi augwaligo genuai olo tau sabo se ebaso, dago bomo eyu agai dage tau siyu, tama dagego duga tau sabo se silimainogo ebaso. ⁷Te tigidali seęe dagego kolesaga wiegi yai mu ebo dao. Dagego homude Kraıde konealubo po daı olama, tama dagego te

^m 8:4 Rom 15:26

konealubo po hanilama pusubo şe bomo ebo dao. Dagego kolesaga hauwa koneama, tama dagego Godigo şe yabo homu mu hodaluai. Dagego da dali dwagi yai homu eyu godolo ebo kolesaga, tede me dagego bugagia mu yali dao. Tialima te tiwai naga megi dagego te gasa we bidi olo tau sabo wiegi yai kolesaga ebo şe me bugagia mu yao.

⁸E tau sabo şede eno bomai po dagebolo me mabo meni. Te menio. Eno dagebolo te meba bidi dabe augwaligo te wiegi yai şe yabo homu hodaluai po obao, tama te kolesagade eno dagego ama dabe dali dwagi yai homu eyu godolo ebo kolesaga usu sobao. Te dago koneainogo, te dagego te we bidi godolo ebo kolesaga te nai mu dao. ⁹Magi baso meni. Dagego te dago Genuai Bidi Jisas Kraisgo olo tau sabo wiegi yai kolesaga ebo şe koneai. Aga God dali hodobo bidiyu, tama genuai nogi dali, bomu yai ula dali si umabo elalubadi, tiali goli agai dage tau somainogo eyu tama aga magi nai meni yai bidi pedalali. Tama aga te magi nai meni yai bidi tiwai pedalaligo te dagebolo te God dali bidiyu bomu yai ula umabo sabo tş dawai dao.

¹⁰Te tau siyu maiabo masigi, tede eno yali homu megi eno dagebolo pusubao: te hasia bidali kibu bede dagego te şe yabo homu godolo naga hasia yai dao, tama te Masedonia tşde bidibo we bidi augwaligo nosali te şe yabo homu yai. ¹¹Teda te şe megi tama dagego ela sili yao. Polobadu dagego te şe yabo godolo polo yali, tama tiwai yali gilama megi me dagego te şe polo silao, te duga nai usu nama te mone gego tiao. ¹²Magi baso meni. Te bidigo godolo mu elama nai maiabo homu ebaso da, teda Godigo te kolesaga godolo mu yaibao. Godigo te bidigo elalubo nai tigidalide homu koneama, tama agai kolesaga tede dagalaibao. Agai te aga elalusişbo naide me dagalogobeo.

¹³Te Juda bage tau siyu, tama dagego duga mone hauwa mayu, tama augwali bugagia bidiyu, tiali goli dage şaş peyu emainogo eno te homu ebeo. Te menio. Eno homugo dage bidibo tigidali ususu si naga elama bidimainogo homu ebo dao. ¹⁴Megi e sogo dagego nai hauwago te nai şaş pali we bidi usu numainogo yaibao. Tama nosali me sogo dage nai şaş pelama tama te Juda dabe augwaligo nai hauwa elalubaso da, teda augwaligo naigo dage usu numainogo yao, eno te homu ebao. Te kolesagade te dage dali augwali dali si tiwai usu yaibao.

¹⁵Te bukude wali po e tiwai dao,

“Te bidigo te tubo nai nogi mana hauwa sali bidi,
te hauwa me meni yani. Tama te nai dwasianu sali
bidigo, te aga te nai me şaş pabeo.”ⁿ

Te şe ebo bidi meba augwali te Korin buluba sabolaibao po wai

¹⁶Eno Godibolo po weyu usu da po obao, agai te bidi Taitusgo homu hodolobaso, tama agai dago homu tiwai ebao. Agai me dage tau sabo

homu godolo mu ebo dao. ¹⁷Magi baso meni. Agai dago Korin buluba pao wali po wali pali. Tiali goli aga me te şe yabo homu godolo mu ebaso, tama aga digi aga homugo dage bidibo madi asabo homu ebao. ¹⁸Tama dago ama me deli aga dali hodobo tagala palaibao. Te tigidali bulude te Godigo po odobo we bidide te ama agai Godigo gesi wiegi yai po pusubo şe ebo nogi elalubao. ¹⁹Tama te tiwai naga me ebeo. Menio. Te haniani bulude bidibo Godigo po odobo we bidi augwaligo te aga sa munama, te aga da dali Jerusalem hanuba biliyu, te olo tau sabo wiegi yai kolesaga tau sabo şe emainogo yai. Dago te Genuai Bidi nogi ugwaba siyu te şe ebao, tama te bidi dabe augwali ola menalama augwaligo konemainogo yali, te dago te tau sabo şe yabo homu mu ebao.

²⁰Dago te olo mabo genuai nai tonalubo kolesaga ebode te bidi me deligo dwai po da dali weyu, “Polgo te Juda bagebolo olo mu maiabo masigi meba buga salio,” te tobage po waidali weyu dago homu yai. Tama tiyu dago te ama dali tagala palobao. ²¹Dago wiegi yai dolo kolesaga yabo homu ebo, te dago Genuai Bidigo gedude naga te kolesaga me egobeo. Menio. Te e tşde bidi dabego gedude dali te kolesaga ebo dao.^o

²²Tama tibaso, dago dena ama me deli augwali si dali hodobo tagala palobao. Hauwa sogo dago aga haniani şede usu sali, tama agai şe bomo elama ebo dago suali. Megi agai homugo te dagego wiegi yai kolesaga naga ebo homu bomu ebaso, tama agai te şe yabo homu bomu ebao. ²³Te Taitusde dagego konemainogo ebao: aga tama ena dali deli şede dage tau sabo şe ebao. Tama dago ama si aga dali hodobo pabo bage, te dagego konemainogo yai: augwali si te Godigo po odobo we bidigo sa muani tagala palali bidi bidibao, tama augwa şede te Kraisgo nogi ugwaba sabo dao. ²⁴Teda dagego duga dwagi yai homu eyu godolo mu ebo kolesaga te bidi dabe augwalibolo ola maişo. Tama te Godigo po odobo we bidi dabe augwaligo dagego te kolesaga ebo mu konemainogo elama, tama dagego şede dago dagede wiegi yai homu pemene ebo page me augwaligo konemainogo tiao.

**Godigo po odobo te Korinde bidibo we bidi augwaligo te Godigo
po odobo we bidi me badu olo mabo tau sabo nai po wali**

9 ¹Te Godigo we bidi Juda bage augwali tau siyu olo mabo nai te dagego koneanio. Tama eno tede bobage po me aşegobeo. ²Eno koneani, dagego te şe yabo homu hodaluali, tama sesemane sogo eno dage nogi te Masedonia bulu bidi dabe augwali gesabidide ugwaba sabo dao. Eno dagede te tiwai po augwalibolo wabo dao, “Te polobadu bidali kibu bede te Akaia genuai tşde bidibo we bidi dabe augwaligo te masigi mabo tau sabo şe gagalainogo sisi yalio.” Tama augwaligo dagego te

şede bomo ebo po odolama, tama tede te Masedonia bidi dabe me hauwa homu hodolalio. ³Tiali goli dago te wabo pode te duga nogi ugwaba siyu, te olo po tiwai pedali weyu, eno te ama dede augwali dageba hasia tagala palobao. Te eno homugo te dagego duga maiabo nai sisi elama bidao, te eno te Masedonia bagebolo wali po gilama tiwai yao. ⁴Dago homu si meni, te dagego maiabo nai sisi yali elalubo homu ebao. Tiali goli eno te homu yali, te Masedonia bidi dabe meba augwali ena dali nosali asiyu tama suyu, te dage sisi isawai ebaso, tama tiyu, da tede hale siyu, tama dage dali me genuai hale mu yabuo. ⁵Tama tibaso, eno homugo eno ama dede augwali bolo te dage bidibo madi aselama polasa sabalomainogo eno augwalibolo te po obao, tama dagego te olo tau selama tolaibao wali nai te augwaligo hasia bolo sisi ilao. Tama te ena me nosali sabalobo si, te olo tau siyu mabo nai te olo mu mayu sisi ebo tiwai elama, tama te nai dago dagede anoma elama sabo tiwai me egobeo.

⁶Dagego homugo te bugagia koneao: nai yogo homu eyu dwasianu nai bulubo bidigo, te agai nai dwasianu naga nosali saibao. Tama te nai hauwa bulali bidigo, te agai nai hauwa saibao. ⁷Dage tigidali deli deligo te Juda bage tau mabo monede duga digi duga bugagia homugo hasia kone palama, tama te homu kolesaga tiwai wali naga peyu mone mao. Tiyu bidi me deligo mabo naide homu seęe elama, tama agai homugo bidi dabego bomu ebaso, tama te kolesagade naga agai te nai mani homu me ilamuo. Menio. Agai digi aga homu hasia dodolama, tama te tiwai naga mao. Magi baso meni. Godigo te bidigo wiegi yai homu pemene elama nai mabo kolesaga ebo bidi, te tobage bidi Godigo godolo ebo dao. ⁸Tama Godigo olo mabo nai tigidali te dagebolo mabo usu mu eyu, tama dage mu paęanluaibao. Tama tigidali sogo dage tigidali nai usu mu elama, tama dagego tigidali wiegi yai se yabo nai hauwa elaluaibao. ⁹Te Godigo po bukude te nai mayu tau sabo kolesaga ebo bidi dali po wali, te po e dao,

“Te bidigo nai hauwa te magi nai meni yai we
bidibolo mani, te bidigo nai wai şanama bulala pabo
tiwai yalio. Te agai doloba pai kolesaga sesemane
sogo elaluaibao.”^p

¹⁰Godigo nai wai te bidibolo bulumainogo menama, tama tigidali bidibolo tubo nai menama tama augwaligo tubo dao. Teda Godigo dage usu nama te nai dabe mayu, tama dagego te gasa Godigo po odobo we bidibolo tau sabo kolesaga genuai mu ilaibao. Tama dagego doloba pai kolesaga umabo mu pedaludaibao, te bidigo nai wai bulai digi tama nosali te nai umabo mu walobo tiwai iduaibao.^q ¹¹Tama dagego nai hauwa elaluaibao, tama dagego homu mu naga eyu, nai hauwa te ama

dede augwalibolo tigidali sogo mabo usu yaibao. Tama dago şede dagego te olo tau siyu mabo naide te ama dede augwaligo te Godibolo usu da po waibao. ¹²Awe, dagego te tiwai şego te Godigo we bidi tau siyu, te kolesagade dagego te augwali şaǵ pali nai usu nubo şe yaibao. Tama te tiwai kolesaga naga me egobeo. Menio. Dagego te tebo kolesaga ebaso, te augwaligo dwagi yai homu eyu, Godibolo usu da po hauwa waibao. ¹³Dagego te ama dede tau sabo şe ebode, tede te dagego kolesaga hanilama pedalaibao. Te ama dede augwaligo koneama, dagego te Godigo po bugagia wali pelama tama Kraisgo wiegi yai gesi po we bidi gedude hania hanilai dao. Tama dagego homu mu naga eyu, olo mabo nai genuai augwalibolo mabo me, te gasa bidi dabebolo me mabo sueibao. Tama eyu augwaligo Godigo nogi ugwaba saibao. ¹⁴Te Godigo olo mabo wiegi yai kolesaga genuai mu dagede elalubo, te augwaligo koneaibao. Tama tiyu augwaligo dage godolo elama, tama augwaligo Godibolo po weyu, te agai te olo tau sabo wiegi yai kolesaga dagebolo mobaso, augwaligo agabolo puba hwi po waibao. ¹⁵Godigo dabolo te olo mani nai, te genuai mu egi pali, tama tede te dwagi yai po tigidali dago pusubo usu me egobeo. Dago Godibolo te olo mabo naide puba hwi po wao.

**Bidi mebago po dwai Polba wali tama te Korin dabego
agaba dwai haliga ilabo şe yali, tiyu Polgo te Korin dabe
augwali homu dodolobo po wali**

(Dqı 10-13)

Polgo aga nogide posobo po wali bagebolo po wei ponai po

10 ¹Te dage tomode bidi mebago po kisila ena dali weyu te po wai, “Pol aga da dali bidiyu, tama aga digi aga aiyaba elaluali, tiali goli aga digibulu bidibo sogo te agai po bomai aşena toloyu da dali wabo dao,” te po wali. Tiali goli ena Pol eno homugo te dagego Kraisgo homu kolesaga hasia bolo kone palao, te aga digi aga homu aiyaba elaluama tama te bidi dabe augwali dali nagame yai kolesaga yai, tama eno me te tobage homu eyu, dagebolo e mobo mabo po megi obao. ²Eno e tama tiwai po dagebolo obao: nosali ena dageba pedalobo si, teda dage dua dao, tiyu eno dagebolo sesena pai po mayabuo. Tiali goli eno homugo eno po te bidi mebago da te tşde kolesagade biliba homu ebo bidi dabe augwalibolo hanilama bomo elama te sesena pai po pusabo homu ebao. ³Mu tama, da te we bidi tomode e tşde bidibo dao, tiali goli Godigo pode boi bidi homu ebo bidi dabe dali hwı̄bode dago te tşde bidigo wı̄bi hwı̄bo tiwai me ebo meni. ⁴Tigidali wı̄bi hwı̄bo nai dabe dago tolalubo, te tşde nai tiwai me elalubeo. Menio. Te Godigo bomu elalubao, te boi bidigo bomai obo alubo usu yaibao. ⁵Dago augwaligo da dali konila po wabo

page pedeyu, tama augwaligo wabo po aiyaba mu elalubo dao. Tama tigidali kolesaga ugwađu mu dolaluyu tama te God koneainogo homu ebo bidi dabego tų palialubo, te me dago huđibo dao. Tama da tigidali bidigo homu kolesaga dago kalabus ilama, te Kraisgo homu kolesaga wali pomainogo ebo dao. ⁶Tama da sisi elama dage tonalubao. Te da dagego bidibo digi sabolama, tama dagego dago po tigidali wali pobaso da, teda dage te dage tomode bidibo te po sela sađu bidi augwalide po tų dodolama tama augwali tigidalibolo dwai dene wei ponaibao.

⁷Dagego te duga gedude elalubo nai bugagia suiyađu. Te dage tomode bidi me deli aga homu aga digi te Kraisgo bidi bidiyu da, teda aga digi homu kone ma palama tama aga te tiwai koneaibao, aga digi te Kraisgo bidi da homu yali da, teda da me te Kraisgo bidi bidibao, da aga dali tiwai si mu dao. ⁸Magi baso meni. Dago Genuai Bidigo dabolo te se emainogo te genuai nogi dabolo mani, te dago dagego Kraisde homu tialubo kolesaga ebode dađu walomainogo yali. Te dage dolomainogo eyu agai te bomu dabolo mabeo. Tama eno dena te seđe dena nogi ugwaba mu sali goli, tede ena hale me sogobeo, te dolo dao, dago dena se bugagia yaibao. ⁹Tiali goli dagego eno aşęna tolobo pasgo te dage olo wi ilibo homu ebo te eno hagela homu ebao. Dagego te tama egimio. ¹⁰Mu tama, bidi meba augwaligo enade tama tiwai po obao, “Awe, te agai aşęna tolobo pasde seđe yai po elaluyu, tama bomu elalubo po me elalubo dao. Tiali goli aga digi sabalobo si tama dago aga digi suyu bomu meni yani, tama agai po te olo nai tiwai dao.” Te tama po wabo dao. ¹¹Te po wabo bidi dabe, augwaligo e tama tiwai homu bugagia kone palao: da digibulu bidiyu tama dago pas naga aşęnama dagebolo tolobo po, te po dali, te da asama dage dali bidiyu ebo kolesaga dali, te si tiwai si mu yaibao, te tedali gasagi yai menio.

¹²Te dago dena digi dali te augwali digi augwa nogi ugwaba sabo bidi dabe dali si dago osola sulama, tama da augwali tiwai si da po wagobeo. Te po wabo dago hagela homu ebao. Magi baso meni. Te bidi dabego augwaligo ebo kolesagago naga te augwa kolesaga usu sabo dao. Me deligo aga ebo kolesaga te gasa bidi mego ebo kolesagade usu sabo se ebo dao. Te tama tebo bidi dabe, augwaligo bugagia konesiabaso, wiegi yai koneai kolesaga me elalubo menio. ¹³Tiali goli da dali, God agai te dago se yabo madi sesegede dađ ilali. Te dađ ilama, tama dage Korin bulude bidibo we bidi dage te dađ tomode bidibao. Tama dago ebo seđe dago dena sali dađ edelama tama dago dena nogi ugwaba me sogobeo. ¹⁴Tama dage te dađ tomode bidaligo da, teda da pologi solama tama Kraisde wiegi yai gesi po dageba sela asali sogo, te sogo dago dena se yabo madi dađ mu edelebeo. ¹⁵Dago te Godigo mawai dađ bolama, tama te gasa bidi dabe augwaligo yali seđe te dago dena digi dena nogi ugwaba me sabo meni. Te menio. Dago homugo te tiwai bomu ebo dao: te dagego duga

homu tigidali Kraisba mubo kolesaga bomo yai pedalobo si, tama dago seş genuai dage tomode pedalomainogo eyu, te dena dage tomode Godigo seş yabo daş usu nama tama te genuai mu pedalaibao. ¹⁶Tama tiyu, dago dage tagalama, tama te Kraisde wiegi yai gesi po te dage u badu elalubo me badu tşde bidibo we bidibolo sela pabo usu yaibao. Te elama, tama dago gasa bidigo te gasa daş ilali tş tomode yali seşde te dago nogi olo ugwaba me sogobeo.

¹⁷Awe, te meni. Te Godigo po bukude po me deli e tiwai elalubao, “Te nogi ugwaba sabo homu ebo bidi, agai te dago Genuai Bidigo yali seşde po weyu, tama Genuai Bidigo nogi naga ugwaba sao,” te po aşani.^r ¹⁸Magi baso meni. Dago koneani, te bidi aga digi aga nogi ugwaba sabo, te bidi aga nogi te God gedude me elalugobeo. Mu menio. Te dago Genuai Bidigo bidi me deligo nogi ugwaba siyu, te dwagi yai bidi da obaso da, te bidi naga nogi mu elaluaibao.

Polgo te tibo po sela pabo bidigo po hanilama pusali

11 ¹Te dageba nosali asali bidi dabe augwaligo augwa digi augwa nogi ugwaba siyu, tama homu kolesaga meni yani po wali goli, dagego augwali tede tagalao wabeo. Tama tibaso, eno homugo dagego ena me gogolama, tama eno te homu kolesaga meni yai po dwasianu waio. Awe, dagego ena gogolao. ²Te gasa bidi dabe augwaligo te dagego Krais wali pabo kolesaga dolidali weyu, eno augwalide dwai homu ebo dao, te Godigo augwalide dwai homu ebo tiwai gilama. Magi baso meni. Bidigo aga penani seş munu me isaşwai wiegi yai bidibo gesi wegi noma te bidi delibolo naga mabo tiwai, te eno dage te bidi deligo naga somainogo eyu sa muanio. Eno dage Kraisbolo maiabo homu ebo dao. ³Tiali goli ena wi ebao. Dago koneani, te dwai hasamani tiwai bidibo bidi Satan agai tibo po wabo mu koneani homu elama, tama polobadu agai te we Iv dago auwa tibo po ola menama tama aga tulaluali. Te dagego tiwai me dage, te dageba tamadi asali bagego po odolama, te tiwai kolesaga dageba pedalobuo. Tiyu, dagego homu mu eyu Krais dali naga wadolama tama wali pabo wiegi yai kolesaga tagalidali homu eno ebao. Ena tede wi ebo dao.^s ⁴Magi baso meni. Te bidi meba augwali dage pageba pedalama, tama Jisasde gasagi yai po pusubao, augwaligo wabo po te dago te Jisade pusubo po tiwai me wabo meni, te gasagi yai tedali dao. Tama te kolesagade dagego te gasagi yai mobo sabo, te dagego polobadu sali te Tedali Mobo Bidi tiwai meni. Tama dagego gasagi yai po augwalidu odobao, te dagego dade sali te wiegi yai gesi po tiwai meni, te gasagi yai tedali dao. Te bidi me deligo te tobage kolesaga dage tomode me ebaso da, teda dagego dwagi yai homu eyu, agai te tobage kolesaga

^r 10:17 Jer 9:24 ^s 11:3 Gag 3:1-5, 13

emainogo gogolobo dao. Tiali goli te dolo menio. ⁵Te bage augwaligo homu te augwali Godigo po sela pabo şe ebo bidi dabe bidiyu, tama augwali te şede polalubo bidi dabe dao, augwaligo te homu ebo dao. Odao. Eno homu augwaligo ena te dwasianu şe me delide aiyaba elalubo menio. ⁶Mu tama, eno te Grik dabego po bugagia pusubo kolesaga te me konesişwani, tiali goli te magigo menio, eno te Kraizde homu kolesaga me şaş pabeo. Mu menio. Tigidali şe ebode dago dagebolo hania ola mawai dao, dago Kraizde kuna mu konebo dao.

⁷Dagego koneani, eno te Godigo wiegi yai gesi po dagebolo ola mani sogo, tede eno masigi me sabeo. Te kolesagade ena digi ena aiyaba elaluama te dage ugwaba siyu yai. Magi yaliwe? Dagego homu eno te yali kolesagade te ena şeşę sali, agawe? ⁸Eno masigi dabe te gasa bulude bidibo Godigo po odobo we bidi mebade sali, te ena dagede şe emainogo eyu augwaligo ena tama tau sai. Te kolesagade te eno augwaligo nai anoma elama olo sabo tiwai yai dao. ⁹Ena dage dali polobadu bidali sogo ena nai me şaş pali, te sogo eno dagede bidi me deli dali aga nai anoma eyu şeşę me mabeo. Menio. Te ama dede dabe augwaligo te Masedonia tş tagalama tama Korin hanuba pedaliyu, augwaligo ena şaş pali nai usu nani. Tama tigidali nai eno bugagia tonaluama, tama dagego duga masigigo ena tau sabode eno dwasianu şeşę dagebolo me mabeo. Tama sesemane sogo eno te tiwai bugagia tonaluaibao.^t ¹⁰Te Kraisgo mu po enade elalubao. Tama tibaso, eno tibo po wasişbo, e mu po naga obao, te tigidali Akaia moni tş badu te bidi me deligo te eno dagede masigi sisşbo kolesagade ena nogi ugwaba sabo te bidi mego tş palibo usu me egobeo. ¹¹Magi baso eno tama obawe? Eno te dagego masigi sisşbo kolesaga ebogo te eno dage dali dwagi yai homu isşyu godolo mu isşyu bidibo te waselebo dawę? Menio. Eno dage dali dwagi yai homu eyu godolo ebo kolesaga ebo, te Godigo koneai dao.

¹²Meba bidi augwaligo homugo eno me te eno ebo şede dagede masigi sao, augwaligo te masigi dagede sabo tiwai yao, augwaligo te homu ebao. Magi baso meni, augwaligo homugo eno te tiwai eyu da, teda augwali da tiwai si bidibaso, augwa digi augwa nogi ugwaba sabo tş elaluaibao. Tiali goli menio, eno te dagego masigi sisşyu te tş palibo şe augwaliba ebao. Tama eno tiwai şe naga me iduaibao. ¹³Magi baso meni. Te tobage şe ebo bidi dabe augwali te Godigo po sela pabo bidi dabe mu menio, augwali te tibo po wabo şe ebo bidi dabe naga bidibao. Augwaligo augwa kolesaga hasegelama, tama tigigo naga augwali te Kraisgo po sela pabo bidi dabe tiwai bidibao, we bidigo gedude. ¹⁴Tama dage tede moni midigi me selamuo. Dago koneani, Satango digi aga tigi hasegelama, tama tigigo naga aga te dwai şe isşwai wiegi yai ensel mobo bidi tiwai pedalobo dao.

^t 11:9 Fil 4:15-18

¹⁵Tama tibaso, aga şe ebo bidi dabe augwaligo me te augwa kolesaga tibo hasegelama, tama te bidi dabe augwali gedude te augwali doloba pai kolesagade şe ebo bidi dabe tiwai pedalobaso da, teda da tede moni midigi me selamuo. Nosali augwali te augwa şe yali usu nama tiwai dwai dene mu saibao.

Pol te Godigo po sela pabo şede dene hauwa tolali

¹⁶Hasia eno po wali, tama megi eno po ma obao, bidi mego ena te konesişwai bidi da te homu munu me elamuo. Tiali goli, dagego homu ena te homu kolesaga meni yai bidi da homu ebaso da, teda dagego ena gogolişo, tama ena me ena nogi ugwaba dwasianu sainogo yaibao, te homu kolesaga meni yai bidi tiwai. ¹⁷Eno dago Genuai Bidigo homu kolesaga wali pelama, eno e po me wabeo. Menio. Eno po te konesişwai bidigo po wabo tiwai eyu, tama ena nogi ugwaba sabo bomu ena digi ebo dao. ¹⁸Bidi hauwa augwaligo te toşde kolesaga wali pelama, tama augwa nogi augwa digi ugwaba sabo dao. Tama eno me te kolesaga osogo wali pelama, tama ena digi ena nogi ugwaba sabo po dwasianu obao. ¹⁹Dagego te eno te tobage kolesaga ebo şe ilali. Magi baso meni. Dagego wiegi yai koneani kolesaga elalubao, tama dagego te konesişwai bidi gogola sula tagalabo homu godolo elama, te konesişwai bidigo po dagebolo momainogo yali! ²⁰Awe, te bidigo dage te aga dologoba mubaso, ma agai dagego nai tigidali silibaso, ma agai dage dali hagoma ebaso, ma agai dage gesabidide elibaso da, teda agai tama temainogo te dagego gogolobo dao, po meni! ²¹Mu tama, augwaligo te tebo kolesagade dago te şe yabo bomu me elalubeo! Tama eno te kolesaga igi sogo da, teda eno şeş şiyu tama hale egi da.

Megi eno po te aga digi nogi ugwaba sabo po wabo kolesaga meni yai bidigo po tiwai obao, te bidi mebago augwa ebo kolesaga po te bomu elama pusubaso da, teda eno me eno bomu elama tama augwali aiyaba elaluabo po pusaibao. ²²Augwali te Hibru dabe da wida, teda ena me te Hibru bidi dao. Augwali te Israel hani bidi dabe da, agawe? Teda, ena me ena te Israel hani bidi da. Augwali te Abrahamgo bulai wai hani da, agawe? Teda, ena me ena te Abrahamgo bulai wai hani bidi mu dao. ²³Augwali te Kraişgo şe ebo bidi dabe da wida, agawe? Megi eno po te aga digi nogi ugwaba sabo kolesaga meni yai polobo bidigo po tiwai mu obao. Eno augwali te Kraişgo şede aiyaba mu elaluali. Te şe dene idu gealigo eno edelama ugwanu igulali. Te eno Kraişde po pusubaso, te boi bidi dabego ena kalabus beba hauwa sogo muani. Tede eno te tibo po ola mabo bidi dabe ela holai dao. Te boi bidi dabe augwaligo ena hauwa sogo mu elali, bidigo nedebo usu egobeo, tede eno e bage augwali aiyaba mu elaluali. Hauwa sogo ena paşde isabo tiwai yai.^u ²⁴E tiwai yai. Te a naga sogo Juda dabe augwaligo ena te dwai kibu waligo nigai bigo elali,

^u 11:23 Tpi 16:23

te nedali te bidi sese deli olama, nogo si olama, nogo me badu a naga me si me si, te 39 tama sogo dađ egi pai. A naga sogo te tiwai ena elali.^v 25Te sela sogo te Rom dabego ena keloago elali. Deli sogo te Juda dabe augwaligo ena ela mumainogo eyu masigi şanama ena elali. Sela sogo moni geba sip dabe doloyu, ena te tamu ađe hagawai. Tama tiyu, sip me deli tama dolali sogo te deli sogo hulide me giligade ena te tamu ađ daide bidali.^w 26Te hauwa sogo ena digibulu tuđu bilali. Ena te pabo ađ hauwade hagawainogo yali. Ena te tuđu bilibo bidi elebo aga nai wi sabo dwai bidi dabe augwaligo nogode dolainogo yali. Te eno hani bage, te Juda hani dabe augwaligo me ena dolainogo homu yali, tama Juda hani isawai bidi dabe augwaligo me ena dolainogo homu yai. Ena te haniani hanude dolainogo yali, tama te bidi meni yai bulude me ena dolainogo yai. Ena te tamu ađe dolainogo yai. Ena te tibo po wabo abagi dede dabe augwaligo nogode me elainogo yai dao.^x 27Eno se dene haniani mu yalio. Hauwa sogo ena hulide se eyu, tama ena godege me pibe. Ena nai sili bidali, tama ena ađ nogonego sali. Hauwa sogo eno nai gisilali. Ena kedaugo me siyu, tama ena ugwa me meni yai bidai dao. 28Tama te naga me ebeo. Menio. Te tigidali deli deli sogo eno te haniani bulude bidibo Godigo po odobo we bidi tigidali tonalubo se eyu, tama tede genuai sege mu enabolo mubo dao. 29Te bidi me deli bomu meni ebawe? Teda, ena me te bomu meni yai tiwai bidaibao. Te bidi me deli te dwai seba tulaluai dawe? Teda, eno te aga te dwai se tomoba kegali bidi dali dwai homu mu yaibao. Awe, tigidali haniani se ebode eno te dagebolo tibo po ola mabo bage augwali eno aiyaba elalubo dao.

³⁰Te gasa tu me meniama, tama ena nogi ena digi ugwaba sobaso da, teda eno te ena bomu meni da po olama, tama tede ena homu pemene yaibao. 31God, te God tama dago Genuai Bidi Jisago Aya, dago sesemane sogo aga nogi ugwaba siyu tama bidada peyu bidada pomainao. Agai koneani, eno tibo po te enaba pedalali seđe me wagobeo. 32Te polobadu eno Godigo se edubadi, me sogo ena te Damaskus moni hanude bidibadi, te tobolu bidi me deli aga te tuni bidi Aretas dologode bidali. Tama te tobolu bidi agai te Damaskus hanu buluba pabo tuđe tonalubo bidi muani. Agai ena selama kalabus ilainogo yali. 33Tiali goli meba ama dede augwaligo ena moni basket wade munama, tama te hanu genuai masigigo nigai bobage obo te windodu augwaligo ena buluba aba bonogo tagalama, tama ena buluba dilama teda soali. Tama ena te tobolu bidi nogode muani tagalama, tama ena sana pelama wi pai dao. Te sogo te seđe ena bomu meni yai bidi mu bidali. Tialima Godigo ena tau sali.^y

**Te nade subo se dabe tiwai gilama eyu, te
Godigo po hauwa Polbolo ola mani**

12 ¹Te gasa bidi dabe augwaligo eno nogi dolobo po dage dali olama, tama dagego ena tau sabo po wei ponosiabaso, ena digi ena nogi

ugwaba sobao. Te gasa tų me elalubeo. Mu tama, te kolesagago da tau me sisabo usu me isawani. Tiali goli tagalama, te dago Genuai Bidigo enabolo te na yali me, te geme dualali po meba mani, tede eno po megı waıbao. ²Ena te Kraısgo bıdı bıdıyu, tama kibı be nogo sı olama sagago me sı me sı polobadu Godigo ena te dagalu sela wali sıgi mu teba ugwaba sela holalı. Te ena teba pobadı ena tıgi dalı bıdalıwe, ma ena tıgi tagalama te eno noma bıdı naga teba palıwe, te eno me konebeo. Godigo naga koneanı. ³⁻⁴Tama Godigo ena te Paradais teba sela holalı. Te ena tıgi dalı bıdalıwe, ma eno tıgi tagalama eno noma bıdı naga teba palıwe, te eno me konebeo. Godigo koneanı. Tede eno te bıdıgo me pusubo usu isiabo tobage po odama, tama te po bıdıgo me pusıdalı weyu habu selalı dao. ⁵Godigo ena dalı te yalı kolesaga, tede eno homu pemene yaıbao. Tiali goli ena dıgi ena nogı ugwaba me sogobe. Ena bomu menı yanı po ena olama, tama tede naga ena nogı ugwaba sabo dao. ⁶Mu tama, ena dıgi ena nogı ugwaba sıgi sogo da, teda ena konesiawai bıdı tiwai me egi menıgi dao. Menıo. Te eno mu po naga wagi da. Tiali goli ena dıgi ena nogı ugwaba me sogobeo. Magı baso menı, eno homugo te bıdı me delıgo te po odolama tama agai homugo ena te wiegi yalı bıdı mu da homu idalı. Eno homugo dagego eno ebo kolesaga sulama, tama dagego eno Godigo po pusubo po odolama, tama te sı naga osola sulama, tama dagego tiwai homu dolo enaba emainogo ebo dao.

Te sesani tiwai naıgo Pol tıgıba enanı

⁷Te po hauwa Godigo enabolo te dagalude ola mani, te genuai wiegi yalı nai mu dao. Tama tede ena dıgi ena ugwaba sabo te Godigo godolo me ebe, tama agai te dene mabo sesanı ena tıgıba enebo nai tiwai nai me delı enabolo mani. Te dene mabo nai te Satango se ebo bıdı tiwai dao, te ena elıdumainogo ebao. Te ena aiyaba elaluama tama te eno te dagalude sualı naıde ena dıgi ena ugwaba me sıdalı olama tıbo dao. ⁸Sela sogo eno dago Genuai Bidıbolu hanaluyu po wali, te dene mabo nai agai enade sela samainogo yalı. ⁹Tiali goli agai te po enabolo walı, “Woo, te eno olu tau sabo wiegi yalı kolesaga nagede usu yalı elalubao. Magı baso menı, te bomu menı yalı bıdıde eno bomu hanıa mu pedalobo dao,” Genuai Bidıgo te po walı. Tama ena bomu menı yalı da te homu sege munu me egobeo. Menıo. Ena wiegi yalı homu pemene mu tede ebo dao, te Kraısgo bomu enade elalumainogo ebao. ¹⁰Tama tıbaso, Kraısbı tobade ena bomu menıama, tama te bıdı dabego enade nogı dwalı posobo po weyu, enabolo dwalı se ilama, tama hananı segego ena sıyu, tama bıdı dabe augwalıgo ena doloyu dwalı sogo enaba pedalobaso da, teda eno wiegi yalı homu tede ebo dao. Awe, te ena dıgi bomu menı ebo sogo, te sogo naga eno homu Kraısbı tıaluyu, tama aga bomu eno sabo dao.

¹¹Te eno te ena dıgi nogı ugwaba salı po tamadı weyu, te eno te kolesaga menı yalı bıdı tiwai yalı. Tiali goli dage, dagego ena hodolobaso

tama eno te po wali. Te duga digi eno nogi ugwaba sigi sogo da, te doloba pai kolesaga egi da. Tiali goli tama me tibeo. Mu tama, ena te olo nai tiwai dao. Tama te gasa bidi dabe augwaligo homu te augwali Godigo po sela pabo şe ebo bidi dabe bidiyu, tama augwali te şede polalubo bidi dabe dao, augwaligo augwa şede te homu ebo dao. Tiali goli ena dali augwali dali si usu siyu da, teda augwaligo ena te dwasianu şe me delide ena aiyaba elalugobeo. Mu menio. ¹²Ena dage tomode bidibadi, te gasa bagego enabolo mani şeşę tigidali eno bugagia toloyu, tama dage tomode şe hauwa elama, tama ena da, te Godigo po sela pabo bidi mu da ola mabo bomai şe eno nogode pedalali. Te e dao: te haniani bidigo işawai bomai şe dage tomode pedalali, te Godigo şe sa munama, tama bidi dodola midigi selama, tama Godigo bomu sumainogo yalio. ¹³Eno te deli tiwai kolesaga te gasa Godigo po odobo we bidi hanibolo yali, te dagebolo yali tiwai şe yali. Eno dage tau sabo şe mede şa mu pabeo. Deli şede naga eno dage dali te gasa Godigo po odobo we bidi hani dali tiwai si ebe. Augwaligo augwa masigigo ena tau sali goli, eno digi dagebolo duga masigigo ena tau sao po munu me wabeo. Tede dagego homu eno şeşę sali homu eyu da, eno homugo dagego te eno sali şeşę sela şayao! Tiali goli eno koneani, eno tede şeşę me sabeo.

¹⁴Megi ena sela sogo dage bidibo madi asabo sisi ebao, tama dagego nai eno anoma eyu sainogo tama dagego duga masigigo ena tau sao po me wagobeo. Te menio. Odao, eno dagego nai me sogobeo. Menio. Eno dage naga sabo homu ebao, eno dage Kraibolo momainogo ebao. Dagego koneani, te wai dabe augwaligo te nai dabe gegebo şe elama te aya de ida si tau sabo şe me egobeo. Menio. Te aya ida augwaligo naga te wai dabe augwali tau sabo şe yaibao. Tama ena da dagego aya tiwai dao. ¹⁵Tama dwagi yai homu eyu, dage tobade eno ena nai tigidali maiabo homu elama, tama ena bidibo ula me maiabo homu ebao, te dage tau sabo homu ebao. Eno dage dali dwagi yai homu eyu godolo mu ebo kolesaga genuai mu ebao, tama te dagego magi baso ena dali homugo dwasianu naga kone palobowe?

¹⁶Tiali goli dage tomode meba augwaligo enade te tiwai po waibao, “Mu tama, agai digi dago masigi hania hanilama me sabe, tiali goli agai te po bebegelebo bidi tibo şe ela mabo bidi, tama te tibo po wabo kolesagago agai te da muma menama, tama gasa bagego nogode te dago masigi sai dao,” augwaligo te po wai. ¹⁷Tialima, eno bidi meba dageba tagala palidu geai. Magi yaliwe? Te augwali me deli augwali nogode eno tibo po olama tama dagego nai anoma elama me sai da, agawe? Te menio. ¹⁸Eno te Taitus hodolama, tama aga dage bidibo madi asali, tama eno te gasa ama me deli aga dali hodobo tagala palali. Tama te Taitusgo ili po olama dagego nai anoma elama me saliwe? Menio. Ma dagego homu te ena dali Taitus si da te Tedali Mobo Bidi deligo bomode naga me

bidibo meni, dagego da si dali te homu ebawe? Da si te tų delide naga me bilibo meni, dagego te homu ebawe? Edao. Dagego te tobage homu da si dali eyu da, teda duga homu hasegelao, te da sigo ebo kolesagade bugagia homugo koneao.

¹⁹Dagego eno tamadi aşani po tigidali tede homugo kone palama, tama tede dagego e tiwai homu idubadi bogo, ‘Te wali pogo te Pol agai aga nogi tau sabo şe naga ebao.’ Tiali goli te mu menio. Dagego da dali po tų eyu, tama dena yali şe osola suabo bidi dabe meni. Abagi mu dede, da Kraisi dali wadolama tama Godigo gedude dolalubadi, dago te po tigidali dagebolo aşana tolobao. Tama tiyu dage tau somainogo eyu dago te po dagebolo aşana tolobao. ²⁰Eno e homu ebao: ena dageba asama, tama dagego ebo kolesaga sulama te eno suainogo homu yali tiwai we bidi me bidibo sugobe homu yaibao, dagego gasagi yai kolesaga ebo eno sueibao. Tama tiyu, eno te dagego ebo kolesaga subaso, tama eno dage dali dodolobo şe ebo tede dagego hagela homu yaibao. Polobadu eno dage dali şe hauwa yali, tiali goli megi ena wi dwasianu eyu homu si dagede ebao. Eno homu ena dageba asama, tama eno dage tomode duga hasi e tiwai haniani dwai kolesaga ebo eno sueibao: konila po wabo me, te amabolo aga elalubo naide dwai homu ebo me, tama şeşę elama wado po wabo me, tama nai yogo kolesaga ebo me, dwai nogi posobo po wabo me, bidi geme posobo po wabo me, te hagoma ebo me, te Godigo po odobo we bidi hani pedaloyu dolobo kolesaga me, te tobage dwai kolesaga ebo eno dage tomode te sueibao, eno te homu ebao. ²¹Eno e homu me ebao, ena dage bidiboba ma asobo si tama ena God agai ena te dagego gesabidide aiyaba elaluaibao. Tiyu eno dage hauwade gela waibao. Magi baso meni, te we bidi polobadu augwaligo te dwai şe yali te tagalama tama homu begelama, tama te meda yai kolesaga me, te penani ebo kolesaga me, te hale işabo dwai dwai şe subigila ebo kolesaga, te augwaligo polobadu yali te dwai kolesaga tudiba me mube. Tama tede eno dage dali yabo şede homu eyu tama homu şeşę elalubao.

Te Korin dabe augwa konealubo po bugagia tonalu dua dao wali po

13 ¹Megi ena dage bidibo madi sela sogo wagnosis te asainogo ebao. Tama asama, eno dage tomode po tų eyu, tama bidi me deli ma we me deli agai naga gasa we bidide po kisilibo te usu egobeo. Godigo po bukude elalubo po me deli wali peyu dago te po tų dodolaibao, te po e dao: “Te bidi si ma bidi sela te pedauwali deli poba muani wida, teda te po bomu elalubaso, tama te tobage pogo naga te po tų dodolobo usu yaibao,” te po aşani. ²Te polobadu dwai şe yali we bidi dabe augwali me, te gasa bidi dabe dage tigidalibolo me, te ena si sogo wagnosis dage

^z 13:1 Bom 17:6; 19:15

dali bidagasali sogo te eno yabo kolesaga po dage dali wali. Tama megi me ena digibulu bidiyu, eno te tiwai po dagebolo ma obao: te ena dage bidibo madi ma asobo si, teda eno te dwai şe yai we bidi dabe augwali eno olo me gogologobeo, eno augwalibolo şeşę mawaibao. ³Dagego enade e tiwai homu ebao, ‘Te Kraisgo Polgo pedauwalidu dabolo po wabo meni dawę, ma po wabo dawę?’ Te homu dagego enade yaligo da, teda dagego hania bugagia konemainogo eyu eno te bagebolo augwa sali şeşę mawaibao. Te Krais dage dali bomo kimi me isiyu me egobeo. Menio. Agai dagede şe bomo mu ebo dao. ⁴Magi baso meni. Polobadu agai aga digi bomo meni yai bidi tiwai ilama tama bidibadi, tama augwaligo aga ni pedaide elali goli, Godigo bomogo megi aga bidibo ulade ma bideibao. Tama da aga dali wadolama, tama da me bomo meni yani tiwai bidibao. Tiali goli Godigo bomogo da aga dali bidibo ulade bidibao. Tama dago te bomo dage tomoba hanilaibao.

⁵Dagego sesemane sogo duga digi duga homu usu sela suyu, te duga homu tigidali Kraisba munama agaba homu tialubowe, ma meni yani, te bugagia koneao. Duga digi duga dagalao. Te bidi Jisas Krais dagego homude bidibo te dagego konebewe? Te meni wida, teda dage usu selama, te usu niba kadu wabeo. ⁶Tama eno homugo dagego konebo te Godigo şe ebode da te usu niba kadu waibao homu dagego ebo dao. ⁷Tama Godigo dage tau siyu, tama dagego dwai kolesaga me deli isamainogo eyu, dago agabolo hanalu wabo po wabo dao. Dago magi baso te tiwai ebo dawę? Te dage wiegi yai we bidi bidibaso, dago dena şe dage dali bugagia yali, te homu emainogo eyu, te dago Godibolo te po hanalu wabo dawę? Woo, te menio. Dena homugo te dagego doloba pai kolesaga yao. Tama tiyu, tama da dageba asama te duga ebo kolesagade po meni baso, tama dago dage dali po tų ebogo dena bomu ola mabo tų meni eyu da, te usu da, magigo meni. ⁸Dagego koneani, dago te mu po aiyaba elaluainogo ebo usu me egobeo. Menio. Dago te mu po naga wabo şe tau sabo naga usu yaibao. Tama tiyu, dagego wiegi yai kolesaga naga eyu da, teda dago dage dali po me wagobeo. ⁹Tama dago dage dali po tų isayų tama tede Godigo da mani bomu waselabo tų meni baso, bidi mebago da bomu meni yai bage da te homu yaibao. Te usu da, po meni. Dagego dwai şe me isayų tama Godigo po bugagia wali peyu tama tede bomu elalubaso, da wiegi yai homu pemene yaibao. Tama dago Godibolo sesemane sogo hanalu wabo po weyu, dago homugo agai dage tigidali dodolama tama dage agai po odobo bomai we bidi mu pedaloyu, agai we bidi mu naga bidaibao. ¹⁰Megi ena digibulu bidiyu, tama eno te dagebolo po aşana tolali, te pagede naga dao: te ena dage dali bidagasobo sogo tama sesena pai bidi tiwai eyu, eno dage te dago Genuai Bidigo enabolo mani şe yabo bomogo eno dage selebo şe idalio. Agai dena yabo şede te bomu dali, genuai nogi dali si dabolo mani, te dago dagego Kraisde homu

tialubo kolesaga ebode daų walomainogo yali. Te dage dolomainogo eyu agai te bomo dabolo mabeo.

Po silagasu wabo po

¹¹Eno ama dedeo, megi eno po paliama, tama eno dage tao po obao. Dagego duga ebo kolesaga dodolama, tama Godigo po odobo bomai we bidi mu pedalobo kolesaga yao. Dagego eno dage tau sabo po odiąo. Dagego te deli tigi poai deli homu naga elama, nagame yai bidao. Tama God da, te we bidi dali dwagi yai homu eyu godolo kolesaga ebo dali, te homu nagame ilibo kolesaga ebo dali si ebo God, aga te dage dali bidaibao.

¹²Te da Godigo we bidigo kolesagade, dage tigidali deli deligo te ama dede, abe dede dali wiegi yai homu elama augwali nogo mao. ¹³Ede bidibo Godigo we bidi tigidali augwaligo dagebolo wiegi yai homu elama siade da po ola tolobao.

¹⁴Eno homugo dago Genuai Bidi Jisas Kraisgo olo tau sabo wiegi yai kolesaga dali, tama Godigo dage dali dwagi yai homu eyu godolo ebo kolesaga dali, tama Tedali Mobo Bidi dage tigidaligo homude abagi tiwai bidibo kolesaga dali, te kolesaga sela dage tigidali dali hodobo mu bidao.